

आकाशवाणी जयपुर-अजमेर

प्रादेशिक समाचार

- केन्द्र सरकार महिला कारोबारियां री मदद सारु यशस्विनी अभियान चलावेला- जयपुर मांय अभियान री शुरुआत काल करी जावेला ।
- मुख्यमंत्री भजनलाल शर्मा पत्रकारां ऊं समाज रा हर तबका ने मजबूत बणावण मांय खास भूमिका निभावण बाबत् कह्यो ।
- रोहित गोदारा गैंग रा ईनामी बदमाश अमरजीत विश्नोई ने इटली रा सिसली शहर ऊं पकड़ी ज्यो ।
- प्रदेश मांय केई ठौड़ां बिरखा रा समाचार-आवता 4-5 दिनां मांय कोटा अर उदयपुर संभाग मांय कठे-कठे भारी बरसात रा आसार ।

000

राज्य री महिला कारोबारियां री मदद कर र वां ने बधावो देवण सारु काल जयपुर रा राजस्थान इंटरनेशन सेंटर मांय पहलो "यशस्विनी" जागरूकता अभियान राख्यो जावेला । केंद्रीय एम.एस.एम.ई. मंत्री जीतन राम मांझी अर मुख्यमंत्री भजन लाल शर्मा इण रो उद्घाटन करेला । इस कार्यक्रम का शुभारंभ करेंगे । एम.एस.एम.ई. राज्य मंत्री शोभा करंदलाजे अर प्रदेश रा उद्योग अर वाणिज्य मंत्री राज्यवर्धन सिंह राठौड़ ई कार्यक्रम मां सिरकत करेला । एम.एस.एम.ई. मंत्रालय मांय निदेशक अंकिता पांडे आज जयपुर मांय खबरनवीसां ने बतायो के ई

कार्यक्रम मांय 600 ऊं बत्ती महिला कारोबारी, खास तौर ऊं खुद सेवक संस्थावां रा सदस्य, सूक्ष्म अनौपचारिक कारोबारी अर महिला कारीगर सिरकत करेला।

000

सुप्रीम कोर्ट राष्ट्रीय परीक्षा एजेन्सी एन.टी.ए. ऊं नीट यूजी-2024 परीक्षा रा नतीजा रो शनिवार दोपहर 12 बज्यां तांई वेबसाइट माथे ऐलाण करण बाबत् कह्यो है। मुख्य न्यायाधीश न्यायमूर्ति डी वाई चन्द्रचूड़, न्यायाधीश न्यायमूर्ति जे0 बी0 पारदीवाला अर न्यायमूर्ति मनोज मिश्रा री पीठ उम्मीदवारां रा नाम उजागर नी करता थकां शहर अर केन्द्र वार नतीजा रा ऐलाण करण बाबत् कह्यो। सुप्रीम कोर्ट री आ पीठ मेडिकल प्रवेश परीक्षा ऊं जुड़ी करीब 40 अर्जियां री सुणवाई कर रही है। मामला मांय अब सोमवार ने सुणवाई व्हेला।

000

मुख्यमंत्री भजनलाल शर्मा कह्यो है के राज्य सरकार पत्रकारां ने और मजबूत बणावण सारू लगातार काम कर रही है। वे राज्य रा माली साल 2024-25 रा बजट मांय पत्रकारां ऊं जुड़्या ऐलाण करण रो आभार जतावण सारू आज जयपुर मांय वां रा रहवास माथे पत्रकारां कानी पत्रकारां कानी ऊं राख्यी ज्या कार्यक्रम मांय बोल रह्या हा। मुख्यमंत्री कह्यो के प्रशासन, राजनीति अर पुलिस री भांत पत्रकार ई प्रदेश रा भला अर विकसित राजस्थान बणावण सारू काम कर रह्या है। कार्यक्रम मांय पत्रकार वां रा भला री योजनावां रा प्रावधान सारू मुख्यमंत्री रो धन्यवाद कीनो।

000

राज्यपाल कलराज मिश्र कोढ़ रा मरीजां रा ईलाज सारू असरदार कोशिशं कारण बाबत् कह्यो है। वे आज जयपुर रा राजस्थान इंटरनेशनल सेंटर मांय राख्यी ज्या अखिल भारतीय कुष्ठ रोग उन्मूलन अधिवेशन मांय बोल रह्या हा। राज्यपाल कह्यो के सरकार अर जनता कानी ऊं मिल र कोशिशं करण री सूरत मांय कोढ़ री बीमारी खत्म करण रा काम मांय तेजी लायी जा सके है। वे कोढ़ रा मरीजां रा विकास अर वां ने खुद रे पाण ऊबा करण सारू बत्ता ऊं बत्ता कार्यक्रम चलावण बाबत् कह्यो।

000

राज्य रा न्यारा—न्यारा ज़िलां अर ब्लॉक मांय चलाया जा रह्या संपूर्णता अभियान रा तैत जनता ने न्यारी—न्यारी सरकारी योजनावां रो फायदो दिरावण री कोशिश करी जा रही है। डूंगरपुर रा मुख्य चिकित्सा अर स्वास्थ्य अधिकारी डॉ अलंकार गुप्ता बतायो के ज़िला रा झोथरी ब्लॉक मांय चलाया जा रह्या ई अभियान रा तैत महिलावां ने गर्भ धारण करण ऊं ले र ईलाज अर जच्चा—बच्चा री सार संभाल रा बारा मांय जाणकारी दी जा रही है।

000

बदमाश रोहित गोदारा रा साथी ईनामी बदमाश अमरजीत विश्नोई ने इटली मांय सिसली शहर ऊं गिरफ्तार कर लियो ज्यो है। वां रे खिलाफ हत्या, डकैती अर फिरौती सारू धमकी देवण समेत न्यारा—न्यारा मामला केई पुलिस थाणा मांय दर्ज है। राज्य री एंटी गेंगस्टर टास्क फोर्स रो काम देख रह्या अतिरिक्त पुलिस महानिदेशक दिनेश एम.एन. बतायो के पकड़ी ज्यो आरोपित ने भारत लावण सारू जरूरी कार्रवाई करी जा रही है।

000

बारां जिला रा अंता मांय आज ट्रक अर स्कूली बच्चां ने ले जा रही वैन बीचे टक्कर रे कारण व्हे हादसा मांय एक टाबरी री मौके ई मौत व्हे गयी जद के 3 बच्चा जखमी व्हे गया। घणा जखमी 2 बच्चां ने कोटा रैफर करी ज्यो है।

000

राज्य मांय न्यारी—न्यारी ठौड़ां अहलकार जन सुणवाई कीनी। बालोतरा मांय जोधपुर रा सम्भागीय आयुक्त बीएल मेहरा अर जिला कलेक्टर सुशील कुमार यादव जनता री फरियाद सुणी। टोंक री ज़िला कलेक्टर डॉक्टर सौम्या झा कलेक्ट्रेट परिसर मांय जनता री परेशानियां सुण र अहलकारां ने जरूरी हुकम दीना। सवाईमाधोपुर मांय जिला कलेक्टर डॉ खुशाल यादव ई कलेक्ट्रेट परिसर मांय जिला स्तर रा जनसुणवाई कार्यक्रम मांय जनता रा दुःख—दर्द सुण्या। सांचौर मांय जिला कलेक्टर शक्ति सिंह राठौड़ जन सुणवाई कर र जनता री परेशानियां दूर करण बाबत् अहलकारां ने जरूरी कार्रवाही करण रा

हुकम दीना। जयपुर ग्रामीण रा जिला कलेक्टर अहलकारां सागे जनता रा दुःखड़ा सुण्या अर परेशानी आगी करण बाबत् चर्चा कीनी। बूंदी मांय जिला कलेक्टर अक्षय गोदारा जिला प्रमुख चन्द्रावती कंवर री मौजूदगी मांय जनसुणवाई कर र करीब एक सौ मामलां मांय जनता ने साता देवण सारू जरूरी जतन करण रा हुकम दीना। वे नगर परिषद रा अहलकारां ने शहर शहर मांय गंदा पाणी री निकासी री व्यवस्था करण रा हुकम दीना। भीलवाड़ा मां राख्खी ज्या जणसुणवाई कार्यक्रम मांय जिला कलेक्टर नमित मेहता 49 जणां री परेशानियां सुणी अर अहलकारां ने परेशानियां आगी करण रा हुकम दीना। कोटपुतली-बहरोड़ जिला री कलेक्टर ई जनसुणवाई कीनी। शाहपुरा री कलेक्ट्री मांय जिला कलेक्टर राजेन्द्र सिंह शेखावत जनसुणवाई कीनी। जालोर मांय जिला कलेक्टर पूजा पार्थ जनसुणवाई कर र जनता री समस्यावां रो निपटारो कीनो।

000

प्रदेश मांय आज ई कठे-कठे बिरखा व्हेवण रा समाचार है। जयपुर मांय दोपहरां री बगत छोटो छिडको व्ह्यो। टोंक अर भीलवाड़ा मांय तेज उमस पाछे छोटो छिडको व्हेवण ऊं गर्मी ऊं आराम मिल्यो। मौसम विभाग रे मुजब लारला 24 घंटा मांय सब ऊं बत्ती 75 मिलीमीटर बरसात झालावाड़ जिला रा पिड़ावा मांय दर्ज करी ज्यी। बंगाल री खाड़ी माथे बण्या कम दबाव रा हलका रा असर ऊं राज्य रा ऊगणी हलका मांय आवता चार-पांच दिन बिरखा चालती रेहवण रा आसार है। कोटा अर उदयपुर संभाग मांय कठे-कठे भारी बारिस रा आसार है। मौसम केन्द्र जयपुर अलवर, टोंक, भरतपुर, सीकर अर सवाईमाधोपुर जिलां सारू ई ऑरेंज अलर्ट जारी कीनो है।

आं जिलां मांय बीजळी पड़बा सागे बिरखा व्हेवण अर जोरदार बायरो बाजण री संभावना है। ई बीचे चूरू जिला मांय मौजूदा सीजन मांय हाल ताई 9 लाख हैक्टर रकबा मांय मूंग, ग्वार, मोठ समेत न्यारी-न्यारी जिंसां री बुआई करी जा चुकी है।

000

चौमासा री रूत मांय राज्य मांय एक पेड़ मां के नाम अभियान रा तैत न्यारी-न्यारी ठौड़ां पौधा रोप्या जा रह्या है। जालोर मांय सांचौर री एक खुद सेवक संस्था कानी ऊं आज राजकीय सावित्री बाई फुले

कन्या छात्रावास मांय पौधा रोपी ज्या। सांचौर ज़िला रा रानीवाड़ा मांय एक गैर सरकारी संस्थान री ओर ऊं नरेगा रा तैत चाल रह्या कमठाणां कने पौधा रोप्यी ज्या। ई दौरान करीब 300 जणा ने पौधा दिया ज्या। भरतपुर रा मास्टर आदित्येन्द्र राजकीय विद्यालय मांय पीपल ,बरगद ,अर्जुन पाखर ,नीम, कचनार अर गूलर रा 100 ऊं बत्ता पौधा रोप्यी ज्या। भरतपुर मांय जिला कलक्टर डॉ. अमित यादव पौधा रोप र जनता ऊं बत्ता ऊं बत्ता पौधा रोप र वां री सार-संभाळ करण री अपीली कीनी। पशुपालन विभाग कानी ऊं राख्यी ज्या कार्यक्रम मांय करंज, नीम, पीपल अर अर्जुन समेत भांत-भांत रा 500 ऊं बत्ता पौधा रोपी ज्या।

000

प्रधानमंत्री सुरक्षित मातृत्व अभियान रा तैत चिकित्सा अर स्वास्थ्य विभाग री ओर ऊं आज आस वाळी महिलावां री स्वास्थ्य जांच करी ज्यी। बूँदी मांय आस वाळी महिलावां री हीमोग्लोबिन, ब्लड प्रेशर, शुगर, लंबाई अर एचआईवी समेत न्यारी-न्यारी जांचां कर र पेट मांय पळ रह्या बच्चा अर खुद री देखभाल रा बारा मांय जाणकारी दीरीजी।

000

प्रधानमंत्री नरेंद्र मोदी 28 जुलाई ने आकाशवाणी ऊं प्रसारित करया जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित करया जावण वाळा ई कार्यक्रम री 112 वीं कड़ी व्हेला। ई कार्यक्रम सारू आप ई विचार अर राय मुफ्त नम्बर 1800-11-7800 रे मार्फत दे सको हो।

000